

諸法無諍三昧法門卷上

教七

陳南嶽思大禪師撰

如萬行中說從初發心至成佛道一身一心一智慧欲為教化眾生故萬行名字差別異夫欲學一切佛法先持淨戒勤禪定得一切佛法諸三昧門百八三昧五百陀羅尼及諸解脫大慈大悲一切種智五眼六神通三明八解脫十力四無畏十八不共法三十二相八十種好六波羅蜜三十七品四弘大誓願四無量心如意神通四攝法如是無量佛法功德一切皆從禪生何以故三世十方無量諸佛若欲說法度眾生時先入禪定以十力道種智觀察眾生根性差別知其對治得道因緣以法眼觀察竟以一切種智說法度眾生一切種智者名為佛眼亦名現一切色身三昧亦名普現色身三昧上作一切佛身諸菩薩身辟支佛身阿羅漢身諸天王身轉輪聖帝諸小王身下作三塗六趣眾生之身如是一切佛身一切眾生身一念心中一時行無前無後亦無中間一時說法度眾生皆是

禪波羅蜜功德所成是故佛言若不坐禪平地顛墜若欲斷煩惱先以定動然後智拔定名奢摩他智慧名毘婆舍那定有無量總說三種下定名欲界定中定名色界定上定名無色界定復次下定是聲聞定總攬三界中定是辟支佛定上定是如來定及諸菩薩定智有無量說有三一者道智二者道種智三者一切種智慧亦有三一者道慧二者道種慧三者一切種慧復次分別說有十一智何者是耶法智世智他心智宿命智苦智集智滅智道智盡智無生智如實智復次盡智無生智分別則有十八種智盡智有九無生智有九是名十八智亦得名為十八心三乘聖人共在四禪諸智慧中問如實道如實智者於一切法總相別相如實能知故名如實智是諸智慧即是一切智亦名無智何以故如先尼梵志問佛經中說先尼梵志白佛言世尊如來一切智慧從何處得佛答先尼無有得處先尼復問云何智慧無有得處佛復答言非內觀中得是智慧非外觀中得是智慧

非內外觀中得是智慧亦非不觀得是智慧是故智慧無有得處故名無智如奇特品說一字入四十二字四十二字還入一字亦不見一字唯佛與佛善知字法善知無字法為無字法故說於字法不為字法故說於字法是故四十二字即是無字復次欲坐禪時應先觀身本身本者如來藏也亦名自性清淨心是名真實心不在內不在外不在中間不斷不常亦非中道無名無字無相貌無自無他無生無滅無來無去無住處無愚無智無縛無解生死涅槃無一二無前無後無中間從昔已來無名字如是觀察真身竟次觀身身復觀心身身者從妄念心生隨業受報天人諸趣實無去來妄見生滅此事難知當譬喻說身本及真心譬如虛空月無初無後無圓滿無出無沒無去來眾生妄見謂生滅大海江河及陂池溪潭渠浴及泉源普現眾影似真月身身心心如月影觀身然欲甚相似身本真偽亦如是月在虛空無來去凡夫妄見在眾水雖無去來無生滅與空中月甚

相似雖現六趣衆色像如來藏身未曾異譬
 如幻師著獸皮飛禽走獸種種像貴賤男女
 差別異端正醜陋及老少世間種種可笑事
 幻師雖作種種變太丈夫形未曾異凡夫雖
 受六趣色如來藏色不變異身本及真心譬
 如幻師睡身心無思覺寂然不變易身身及
 心數如幻師遊戲故示六趣形種種可笑事
 身身衆生體難解譬喻說如此法性無涅槃
 亦無有生死譬如眠熟時夢見種種事心體
 尚空無何況有夢事覺雖了了憶實無有於
 此凡夫顛倒識譬喻亦如是禪定智慧能覺
 了餘散心智不能解非但凡夫如夢幻月影
 現水種種事復次諸佛菩薩聖皆爾從初發
 心至佛果持戒禪定種種事甚深定心不變
 易智慧神通幻化異法身不動如空月普現
 色身作佛事雖無去來無生滅亦如月影現
 衆水何以故如經論中說欲學一切智定必
 修諸善心若在定能知世間生滅法相亦知
 出世三乘聖道制心禪智無事不辦欲求佛
 道持淨戒專修禪觀得神通能降天魔破外

道能度衆生斷煩惱問曰般若經中佛自說
 言欲學聲聞當學般若欲學緣覺當學般若
 欲學菩薩當學般若復次有六波羅蜜般若
 為前導亦是三世諸佛母汝今云何偏讚禪
 不讚五波羅蜜復次如經中說五度如盲般
 若如眼汝今云何偏讚度不讚明眼誰能信
 者願廣解說除我等疑惑答曰諦聽善思念
 之吾當為汝決定說
 三乘般若同一觀 隨證淺深差別異
 如大海水無增減 隨取者器大小異
 聲聞緣覺及菩薩 如來智慧亦如是
 十二因緣四種智 下智聲聞中緣覺
 巧慧上智名菩薩 如來頓覺上上智
 以無名法化衆生 方便假名差別異
 三乘智慧不能知 唯佛世尊獨知耳
 如大集經雜四諦 三乘法行同一義
 陳如稽首白世尊 十方菩薩大衆集
 云何名法行比丘 願佛演說法行義
 爾時佛告憍陳如 至心諦聽今當說
 若求法行諸比丘 誦如來十二部經

謂修多羅及毘雲 優婆塞舍及毘尼
 樂為四衆敷暢說 是樂誦說非法行
 若更復有諸比丘 誦如來十二部經
 能廣演說思惟義 是樂思惟無法行
 若復次有諸比丘 更讀誦十二部經
 演說思惟觀其義 是名樂觀無法行
 夫法行者三乘同 一觀我今當說者
 有比丘能觀身心 心不貪著一切相
 謙虛下意不生慢 不以愛水洗業田
 不於中種識種子 滅覺觀法境界息
 永離煩惱心寂靜 比丘如是觀身心
 佛說是人真法行 如是比丘即能得
 聲聞緣覺佛菩提 法行比丘觀三事
 觀身觀受及觀心 比丘觀察三念已
 一心四禪十八智 復次大智論中說
 聲聞緣覺及諸佛 四禪二九十八智
 同共證道明闇異 共觀四諦十二緣
 隨機感悟種種異 聲聞四諦十六心
 辟支獨覺無漏智 菩薩亦解二乘法
 獲得無礙十六諦 如諸天共寶器食

飯色黑白各有異 四諦譬喻如燈品
定如淨油智如炷 禪慧如大放光明
照物無二是般若 證明本無差別照
觀者眼目明暗異 禪定道品及六度
般若一法無有二 覺道神通從禪發

隨機化俗差別異

問曰佛何經中說般若諸慧皆從禪定生答
曰如禪定論中說三乘一切智慧皆從禪生
般若論中亦有此語般若從禪生汝無所知
不解佛語而生疑惑作是狂難汝何不見十
方諸佛若欲說法度衆生時先入禪定以神
通力能令大地十方世界六種震動三變土
田轉穢爲淨或至七變能令一切未曾有事
悉具出現悅可衆心放大光明普照十方他
方菩薩悉來集會復以五眼觀其性欲然後
說法復次般若波羅蜜光明釋論中說有人
疑問佛佛是一切智人智慧自在即應說法
何故先入禪定然後說法如不知相論主答
曰言如來一切智慧及大光明大神通力皆
在禪定中得佛今欲說摩訶般若大智慧法

先入禪定現大神通放大光明遍照一切十
方衆生報禪定恩故然後說法爲破外道執
外道六師常作是言我是等智慧於一切常
用常說不須入禪定佛爲降伏如是邪見諸
外道輩先入禪定然後說法復次如勝定經
中所說若復有人不須禪定身不證法散心
讀誦十二部經卷卷側滿十方世界皆闍誦
通利復大精進恒河沙劫講說是經不如一
念思惟入定何以故但使發心欲坐禪者雖
未得禪定已勝十方一切論師何況得禪定
說是語時五百論師來詣佛所俱白佛言我
等多聞總持十二部經及韋陀論五部毘尼
講說無礙十六大國敬我如佛世尊何故不
讚我等多聞智慧獨讚禪定佛告諸論師汝
等心亂假使多聞何所益也汝欲與禪定角
力如盲人欲觀衆色如無手足欲抱須彌
山王如折翅鳥欲飛騰虛空如蚊子翅欲遮
日月光如無船舫人欲度大海皆無是處汝
等論師亦復如是欲角量禪定無有是處復
次毘婆沙中說若有比丘不肯坐禪身不證

法散心讀誦講說文字辨說爲能不知詐言
知不解詐言解不自覺知高心輕慢坐禪之
人如是論師死入地獄吞熱鐵丸出爲飛鳥
猪羊畜獸雜狗野干狐狼等身若復有人不
近善知識雖復坐禪獲得四禪定無有轉治
無方便智不能斷煩惱雖得寂靜之樂煩惱
不起獲四禪時謂得寂滅涅槃之道便作是
念我今已得阿羅漢果更不復生如此比丘
實不得道不斷煩惱但得似道禪定不近善
知識無方便智謂得實道起增上慢臨命終
見受生處即生疑悔阿羅漢者更不復生我
今更生當知諸佛誑惑於我作是念時即墜
地獄何況餘人不坐禪者重宣此義而說偈
言

欲自求度及衆生 普遍十方行六度

先發無上菩提心 修習忍辱堅持戒
晝夜六時勤懺悔 發大慈悲平等心
不惜身命大精進 欲求佛道持淨戒
專修禪智獲神通 能降天魔破外道
能度衆生斷煩惱 從初發心至成佛

一身一心一智慧 為欲教化眾生故
 萬行名字差別異 欲覺一切諸佛法
 持清淨戒修禪定 捨諸名聞及利養
 遠離憤鬧癡眷屬 念十方佛常懺悔
 不顧身命求佛道 獲得百八三昧門
 亦得五百陀羅尼 及諸解脫大慈悲
 五眼六通一切智 亦得三明八解脫
 具足十力四無畏 三十二相八十好
 三十七品具六度 十八不共微妙法
 視諸眾生如一子 四弘誓願具四攝
 四無量心道種智 一切種智四如意
 觀察眾生廣法施 入四禪定放光明
 徧照十方諸世界 變穢為淨大震動
 現諸奇特希有事 十方菩薩悉集會
 三界天王皆在此 端坐瞻仰一心待
 同聲三請願聞法 從禪方便三昧起
 為眾隨應演說法 色身香聲種種別
 禪定寂然心不異 雖在座坐現法身
 十方九道無不遍 淨戒禪定三昧力
 十方了了分明見 應可度者如眼前

未可度者即不見 如空月影現眾水
 闇室深井即不現 譬如幻師種種變
 盲瞎之人則不見 盲瞎睡重者不見
 諸佛法身鏡亦爾 三障眾生不能見
 若無淨戒禪智慧 如來藏身不可見
 如金鑛中有真金 因緣不具金不現
 眾生雖有如來藏 不修戒定則不見
 淨戒禪智具六度 清淨法身乃顯現
 淨妙真金和水銀 能塗世間種種像
 如來藏金和禪定 法身神通應現往
 普告後世求道人 不修戒定莫能強
 無戒定智皆不應 忽忽亂心講文字
 死入地獄吞鐵丸 出為畜生彌劫矣
 如是眾生不自知 自稱我有大智慧
 輕毀一切坐禪人 壞亂正法作魔事
 假使講經恒沙劫 都不曾識佛法義
 如殺三千世界人 及諸一切眾生類
 高心謗禪壞亂眾 其罪甚重過於此
 譬如羣賊劫牛乳 高聲唱得醍醐味
 不知鑽搖及燬煖 亦失酪漿生熟酥

麤淺薄味尚都失 醍醐上味在何處
 不修禪智無法喜 譬喻說言無婦女
 不淨亂心執文字 故言皮囊可盛貯
 譬如盲狗咬草菴 不見人及非人類
 但聞風吹草鳴聲 高聲叫言賊虎至
 養一盲狗虎咬故 舉世盲狗叫亂沸
 其心散亂都不定 覺觀心語亦如是
 讚百千經心常亂 如蛇吐毒與世諍
 增見諸非毒轉盛 自言壞常子難生
 既見禪智法喜妻 石女無兒難可生
 解文字空不貪著 若修定時解無生
 禪智方便般若母 巧慧方便以為父
 禪智般若無著慧 和合共生如來子
 三乘聖種從是學 故稱一切眾導師
 淨戒禪智如大地 能生萬物載羣類
 禪智神通巧方便 能生三乘一切智
 若能一念在禪定 能報三世佛恩義
 三世諸佛坐道場 覺悟眾生皆由此
 一切凡夫共一身 一煩惱心一智慧
 真如一像不變易 善惡業影六道異

諸佛菩薩一法身 亦同一心一智慧
一字萬行化衆生 一聖假名四十二
凡聖色藏一而二 方便道中凡聖二
色藏元象無一二 唯佛與佛乃知此
我從無數十方佛 聞此一字無量義
少行法師不能知 文字論師不能解
若人不近善知識 學得有漏似道禪
初禪謂得須陀洹 四禪謂得阿羅漢
起增上慢諸漏盡 謂言斷結不更生
臨命終時見生處 卽作是言佛欺我
阿羅漢者不更生 我今云何更受生
身證不了尚如此 何況散心著文字
不知詐知起我慢 顛倒說法誑衆生
身不證法昇高座 死入阿鼻大地獄
身證不了尚生疑 何況不證盲心說
高心亂語謗諸佛 受學之徒皆効此
從地獄出爲畜生 備作種種諸雜類
若人親近善知識 證無漏禪乃明解
具足禪智多聞義 如是導師可依止
禪定深隱難可知

復次禪波羅蜜有無量名字爲求佛道修學
甚深微妙禪定身心得證斷諸煩惱得一切
神通立大誓願度一切衆生是乃名爲禪波
羅蜜立大誓願故禪定轉名四弘欲度衆生
故入深禪定以道種智清淨法眼觀察衆生
是處非處十力智爾時禪定轉名四無量心
慈悲愍衆生拔苦與樂離憎愛心平等觀察
爾時禪定轉名慈悲喜捨既觀察已與其同
事隨應說法爾時禪定轉名四攝法布施愛
語利益同事是名四攝法也復次大慈大悲
現如意神通一切色身以神通力入五欲中
遍行六趣隨欲度衆生爾時禪定轉名神通
波羅蜜亦普現十方一切佛事常在禪定寂
然無念復次深大慈悲憐憫衆生上作十方
一切佛身緣覺聲聞一切色形下作六趣衆
生之身如是一切佛身一切衆生身一念心
中一時行無前無後無中間一時說法度衆
生爾時禪定及神通波羅蜜轉名一切種智
亦名佛眼復次菩薩摩訶薩持戒清淨深妙
禪定斷習氣故遠離三世諸愛見故爾時禪

定轉名十八不共法復次菩薩摩訶薩以三
明智分別衆生爾時禪定轉名十力善知是
處及漏盡故復次菩薩摩訶薩色如受想行
識如觀一切法始從初學終至成佛斷煩惱
及神通盡知十方世界名號亦知三世諸佛
名號及知諸佛弟子名號亦知一切衆生名
號及知衆生煩惱名號解脫名號一念一時
知及知宿命因緣之事爾時禪定轉名十號
也復次菩薩摩訶薩以諸法無所有性一念
一心具足萬行巧方便慧從初發心至成佛
果作大佛事心無所著總相智別相智辯說
無礙具足神通波羅蜜供養十方一切佛淨
佛國土教化衆生爾時禪定轉名般若波羅
蜜復次行者爲出世間故三界九地名爲八
背捨次第斷煩惱欲界未到地禪及中間二
禪及四禪空處及非有想最後滅受想於欲
界中具五方便一者發大善心求佛道故欲
得禪定名善欲心是善欲心能生一切佛法
能入一切禪定能證一切解脫起一切神通
分別欲界色界無色界五陰三毒四大十二

入十八界十二因緣一切諸法無常變異苦空無我亦知諸法無生滅真實相無名無字無漏無為無相無貌覺了諸法故名法智未到初禪得金剛智能斷煩惱證諸解脫是名未到地初欲界地及未到地如是二地是佛道初門欲得禪定是名欲心復次初夜後夜專精學禪節食攝心捨離眷屬斷諸攀緣是名精進復次專念初禪樂更無餘念是名念心復次巧慧籌量欲界五欲欺誑不淨是三惡道伴初禪定樂斷諸欺誑得真智慧是入涅槃伴是籌量是名巧慧心復次專心一處滅諸覺觀境界都息身心寂靜是名一心如是五方便能斷五欲妖媚煩惱滅除五蓋有覺有觀離生得喜樂入初禪名初背捨得入二禪名二背捨入第三禪名三背捨喜樂心內清淨得四禪名爲入一切處滅一切色相捨第四禪滅有對想入無邊虛空處名爲空一切處第四背捨虛空處定得一切識處定是名識一切處第五背捨復次捨識處定入無所有處定是名第六背捨捨無所有處定

得入非有想非無想處定生厭離心是名第七背捨捨非有想非無想處定入滅定受想定心無所著是名第八背捨爾時禪波羅蜜轉名八背捨復次自覺覺他通達無礙得三解脫能破三界一切煩惱爾時禪波羅蜜轉名十一智復次行者總持旋陀羅尼戒定慧三分八聖道破四顛倒獲四真諦爾時禪波羅蜜轉名三十七品起一切神通所謂四念處四正勤四如意足五根五力七覺分八聖道分名爲摩訶衍如四念處品中說轉一切智慧以一神通現一切神通以一解脫作一切解脫轉一名字語句入一切名字語句如是一切名字語句還入一名字一語一句平等不異是四念處字等語等諸字入門一切佛法盡在其中復次菩薩摩訶薩欲教化衆生令生清淨歡喜信心故與一切聖人建立一聖官階位次第衆生之得大歡喜決定無疑爾時捨願勤修禪定得六神通作轉輪聖王入五道中飛行十方廣行布施須衣與衣須食與食金銀七寶象馬車乘樓櫓宮殿

房舍屋宅五欲衆具簫篳篥琴瑟鼓吹隨衆生欲盡給與之後爲說法令其得道雖作如是種種法施實無施者無財物無說無示無聽法者譬如幻師幻作幻人四衢道中化作高座廣說三乘微妙聖法又作四衆集共聽受如是幻師所作幻事無色無心無示無聽無受無聞無得菩薩爾時禪波羅蜜轉名檀波羅蜜何以故施人物時雖知諸法無所有性無施無受無財物相三事俱空雖知空寂勤行布施復次菩薩摩訶薩雖知諸法空罪相不可得持戒破戒如夢如幻如影如化如水中月雖知諸法無生滅堅持淨戒無毀缺亦以戒法爲他人說若人惡心不受戒化作禽獸行禮儀人類見此大羞辱各發善心堅持淨戒發大誓願遍十方不顧身命行戒施常現六道種種形廣說如來清淨戒以宿命智觀察之必令歡喜無瞋害非但爲說戒法亦說攝根定共戒道共戒性寂戒報寂戒爾時禪波羅蜜轉名尸波羅蜜復次菩薩摩訶薩行此財施法施戒施時受者瞋恚來打

罵割截手足心不動乃至失命心不悔爾時
禪定轉名羸提波羅蜜菩薩行是甚深禪定
於一切聖行以法忍故心無所著禪定即是
羸提波羅蜜復次菩薩學四念處時獲得四
禪復作是念我於身念處未得如意神通受
念處未獲宿命神通修心念處未獲他心智
不知十方凡聖心故修法念處時如是思惟
我今未獲漏盡神通修身念處觀一切色亦
未得清淨天眼於受念處未證因緣業報垢
淨神通於心念處未得衆生語言三昧作是
念已勤精進求乃至成就具六神通爾時禪
定轉名精進毘梨耶波羅蜜復次菩薩為起
神通故修練禪定從初禪次第入二禪三禪
四禪四空定乃至滅受想定一心次第入無
雜念心是時禪波羅蜜轉名九次第定復次
菩薩入初禪時觀入出息自見其身皆悉空
寂遠離色相獲得神通乃至四禪亦復如是
入初禪時觀入出息見三世色乃至微細如
微塵許悉見無礙亦見衆生出沒果報差別
於無量劫通達無礙是名天眼神通乃至四

禪亦復如是入初禪時觀息出入以次第觀
聲悉同十方凡聖音聲是名天耳神通乃至
四禪亦復如是入初禪時觀入出息住息住
舍摩他觀色相貌以毘婆舍那觀他心相善
知十方凡聖之心是名他心智神通乃至四
禪亦復如是入初禪時觀息入出獲得眼通
得眼通已觀於有歌羅邏時五陰生滅乃至
無量劫中五陰生滅獲得宿命是名宿命神
通乃至四禪亦復如是悉能觀察一切衆生
善惡業行差別不同亦復知其發心早晚入
道遠近十方三世通達無礙是名道種智慧
神通爾時禪定轉名師子奮迅三昧以神通
力供養十方佛及教化衆生淨佛國土邊際
智滿十地具足變身如佛滿十方學佛神通
未得滿足是師子奮迅三昧唯有諸佛乃能
具足復次菩薩入重玄門修四十心從凡夫
地初發心時所修禪定次第重入乃至最後
無垢地修諸禪定學佛神通化衆生法從初
禪入乃至滅受想定三禪四禪四空亦復如
是是名順超無礙從滅受想定超住散心中

超入初禪非有想非無想處無所有處識處
空處四禪乃至二禪亦復如是是名逆超自
在無礙爾時禪定轉名超越三昧修佛神通
得佛智慧餘五波羅蜜亦復如是是少一波
羅蜜不名五波羅蜜復次學禪定時修四念
處於欲界中觀内外色入初背捨具足聞慧
觀内外假二相不可得故亦非是一如如性
故一解脫復次思慧具足觀察内外法内外
一切法總相別相異相不可得如故二解
脫復次修慧六觀具足色界五陰空三解脫
復次聞慧修慧用巧方便金剛智破四空定
無貪著心空五陰不可得故得解脫空處得
解脫識處得解脫無所有處得解脫非有想
非非想處得解脫觀滅受想定不可得故得
是解脫是名八解脫如如性故無縛無脫菩
薩爾時禪波羅蜜名八解脫復次菩薩禪定
修四念處得三十七品具足佛法何以故是
身念處觀色法故一念具足四念處故是身
念處用念覺分觀五陰時能斷一切煩惱故
觀色陰時是身念處不淨觀九想具足舍摩

他能破一切煩惱是名為定如論偈中說
初觀身念念 繫縛心令定 亦繫縛識定
及除煩惱怨

九想舍摩他欲界金剛定能破五欲如縛賊
十想毘婆舍那欲界未到地金剛智能觀五

陰畢竟盡想不能更生得盡智無生智斷一

切煩惱如意利刀斬斷賊頭觀色如受想行

識如深觀五陰如如性故即無煩惱可斷亦

無解脫涅槃可證何以故色即是空空即是

色受想行識即是空空即是受想行識空即

是涅槃涅槃即是空煩惱即是空空即是煩

惱智慧即是空空即是智慧不可以虛空斷

虛空不可以虛空證虛空如論偈說

觀身不淨相 真如性常定 諸受及以心

法亦如是觀

煩惱者六欲心也初死想能斷威儀語言欲

膨脹想壞想散想能斷形容欲青瘀血塗想

膿爛想能斷色欲骨想燒想能斷細滑欲散

想滅盡想能斷人欲如論中說

四蛇同一篋 六賊同一村 及王旃陀羅

分自守根門 六欲妖媚起 愛怨詐為親

聲香味觸法 六情起諸塵 貪欲如猛火

瞋恚如蛇虻 愚癡覆心眼 智者當善觀

外想三四塊 身器二六城 中含十二穢

九孔惡露盈 癰疽蟲血雜 膨脹臭爛膿

骨鏹分離斷 六欲失姿容 九想觀成時

六賊漸已除 及識愛怨詐 兼知假實虛

四大共相依 緣習成假名 行者諦觀察

但見骨人形 初觀如珂許 後漸滿一城

骨人遍法界 深生憂厭道 從生至老死

老死復有生 轉輪十二緣 生死如循環

三塗苦難忍 人天亦復然 誰聞六道苦

而不興厭心 妄識本無體 依因寂法生

妄想生妄想 轉輪十二緣 知過二業患

現不造三因 老死更不續 反流盡生源

諸法無諍三昧法門卷上

諸法無諍三昧法門卷上

校勘記

一 底本，清藏本。

一 七七九頁上二行首字「陳」，南無。

一 七七九頁中一五行「能知」，南作

「能知能知」。

一 七七九頁下一七行第九字「潭」，

南無。

一 七七九頁下一八行第六字「身」，

南無。

一 七八〇頁上六行「身身」，南作「故

身身」。

一 七八〇頁上七行第八字「故」，南

無。

一 七八〇頁上九行第一六字「心」，

南無。

一 七八〇頁上一〇行末字「於」，南

作「主」。

一 七八〇頁上一六行「如月」，徑作

「如是」。

一 七八〇頁上一七行末字「必」，南

作「心」。

一七八〇頁上末行第三字「淨」，南無。

一七八〇頁中一行第二字「能」，南無。

一七八一頁上九行「般若論中」，南作「般若論下」。

一七八一頁上一四行末字「他」，徑作「十」。

一七八一頁中四行「如是邪見」，南作「如是邪伏如是邪見」。

一七八一頁中六行第二字「所」，南無。又「證法」，南作「說法」。

一七八一頁中一七行第二字「王」，南作「上」。

一七八二頁中二行末字「變」，南作「反」。

一七八三頁中一五行第一三字「下」，南作「亦」。

一七八四頁下一行第九字「蕭」，南作「爭」。

諸法無諍三昧法門卷下

教八

東 南 宗 師 撰

四念處觀身念處觀如音品

觀身不淨時先觀息入出生滅不可得次觀心心相若先觀色羸利難解沈重難輕若先觀心微細難見心空無體託緣妄念無有實主氣息處中輕空易解先觀入息從何方來都無所從亦無生處入至何處都無歸趣不見滅相無有處所入息既無復觀出息從何處生審諦觀察都無生處至何處滅不見去相亦無滅處既無入出復觀中間相貌何似如是觀時如空微風都無相貌息無自體生滅由心妄念息即動無念即無生即觀此心住在何處復觀身內都不見心復觀身外亦無心相復觀中間無有相貌復作是念心息既無我今此身從何生如是觀時都無生處但從貪愛虛妄念起復觀貪愛妄念之心畢竟空寂無生無滅即知此身化生不實頭等六分色如空影如虛薄雲入息氣出息氣如空微風如是觀時影雲微風皆悉空寂無斷

無常無生無滅無相無貌無名無字既無生死亦無涅槃一相無相一切眾生亦復如是名總觀諸法實相如是觀竟欲得神通觀身四大如空如影復觀外四大地水火風石壁瓦礫刀杖毒藥如影如空影不能害影空不能害空入初禪時觀息入出從頭至足從皮至髓上下縱橫氣息一時出入無礙常念已身作輕空想捨羸重想是氣息入無聚集出無分散是息風力能輕舉自見已身空如水沫如泡如影猶如虛空如是觀察久修習竟遠離色相獲得神通飛行無礙去住遠近任意自在是身念處不淨觀法九想十想及觀氣息生滅出入空無障礙亦能獲得如意神通先證肉眼次觀天眼能見無量阿僧祇十方三世微細色等亦見眾生生死出沒善惡業報皆悉知之明了無礙總攝十力十八不共法能作大身徧滿十方能作小身細如微塵一能作多多能作一重能作輕輕能作重醜陋作端正端正作醜陋長短大小青黃赤白悉能變化虛空作地地作虛空地作水

火水火作地能令變作金銀七寶石譬草木亦復如是皆能變作金銀七寶象馬車乘城郭樓閣宮殿屋宅房舍燈燭日月大珠及如意珠飲食衣服床榻被褥簫笛笙篳五欲眾具眾人所須盡給與之然後說法令入佛道能自變身作十方佛身名字不同色像差別亦復能令皆作金色三十二相八十種好頂上肉髻光明普徧滿十方間無空處十方遠近如對目前過去未來亦復如是人天交接兩符相見亦復能作菩薩緣覺阿羅漢身釋梵四王諸天身轉輪聖王諸小王身能作四種佛弟子形男變為女女變為男亦作六趣眾生之身如是凡聖眾色像一念心中一時行語言音聲亦復如是亦復能作臭爛死屍縛魔波旬令捨高慢遠離魔業求佛正道臭爛屍觀非獨繫縛波旬魔王亦能降伏一切姪女令捨要欲發清淨心信求佛道是禪波羅蜜身念不淨觀法初修行時能斷五欲一切煩惱能除五蓋能斷十纏若人修習如偈所說氣息輕空風火觀飛行十方無障礙皮

肉筋骨不淨觀獲得如意大神通總名八大自在一切形色能變化總名十四變化心非但變化如上事能令大地六種動變十方穢為淨土是身念處不淨觀總說如是大功德若廣諸說不可盡三十七品亦在中今已總說身念處種種功德差別法受念處品復次禪波羅蜜中受念處觀如偈說能斷一切受今當更總說斷除三受法一切受亦盡三受者一者苦受二者樂受三者不苦不樂受如十二因緣中說不苦不樂受但是無明有名無色苦樂二受是行識名色六入觸受愛取有生老死滅壞苦憂悲惱如是三受和合共成事不能一一獨生煩惱內受外受內外受內受是六根名為六情外受是六塵名為六境內外受名六識亦名為心思惟分別如是內外有三十種六根六塵六識六觸六受是名三十皆由無明不能了故貪善惡業徧生六趣若能修習戒定智慧淨三毒根名曰六度是故論言智度大道佛從來生死往來故曰大道智慧斷三受故名為度是故佛言

淨於三毒根成佛道無疑一切貪瞋癡三受以為根破戒是惡趣門持戒是善趣門若修戒定智閉塞諸惡道通達善趣門亦得名為關閉一切諸惡趣門開佛無上大菩提門六根名為門心為自在王造生死業時貪著六塵至死不捨無能制者自在如王是故名為無上死王譬如世間五月農時雨大惡雹五穀果樹摧折墮落人畜皆死是惡雹兩譬如金剛無能制者斷諸善根作一闍提是故名為死金剛兩譬如世間金翅鳥王飛行虛空四大海中擒捉諸龍自在無礙食瞰令盡無能制者是故名為死金翅鳥譬如世間惡轉輪王飛行虛空遍四天下擒捉諸王自在無礙壞他事業無能制者是故復名死轉輪王一切天人王無能制者唯除一人大力神仙幻術呪師智如金剛能伏一切乃能伏此生死心王亦復如是二十五有無能制者唯除菩薩修戒定慧智獲得初禪至第四禪及滅受想定成就四念處法忍具足得大神通乃能降伏生死心王一切凡夫及二乘人不能

降伏如是死王為無常法之所遷故不能降伏唯有法大力菩薩生分盡者乃能降之無習氣故苦受內苦外苦內苦者飢渴悲惱愁憂瞋恚嫌恨宿怨不適意事怨憎會時內心大苦如是等苦名為內苦復次求物不得若得更失五欲眾具愛別離故父母兄弟妻子眷屬抄劫死亡若遭惡病無藥可治必死無疑憂悲啼哭如是等苦皆名內苦聞外惡聲罵辱機刺內懷忿怒亦名內苦外苦者若為王法所加鞭杖拷楚牢獄繫閉桎械枷鎖名為外苦亦名內外苦若師子虎狼諸惡毒獸風雨寒熱如是等比名為外苦若自身有病諸根不具足名身苦若為他役使擔負重載若行遠路中間險難無止息處如是等苦是名身苦應學慈悲修空忍之不生瞋恚於怨憎處應作是念是我先世惱害彼人今但自責不應瞋他虎狼獅子狂象惡王亦復如是於貪求處應求捨心不應瞋惱觀惡音聲如空中響彼聲不來耳不往受隨聞隨滅誰罵誰受則無瞋恚聞好音聲稱揚讚歎如前觀

之亦不生喜禮拜供養一切樂受應作是念
彼自求福便於我處自作功德不聞我事不
應歡喜譬如瘠田有人耕種自求報故地不
應喜復有異人多持糞穢毒刺惡草積種在
中掘鑿穿穴高下不平彼人自生如是惡心
地亦不瞋亦不念彼徒自苦惱有人問言怨
害罵辱能忍不瞋是事可爾禮拜供養讚歎
樂受何以不喜答曰彼今雖復供養讚歎於
我後若遇惡緣即便瞋我若打若殺不應生
喜若受樂受皆如幻化無有定相不應瞋喜
如彼大地無憎愛心菩薩欲求無上佛道應
先修學大地三昧亦應學如虛空三昧不苦
不樂受亦復如是不應貪著應作是念苦樂
中間故有不若不樂若無苦樂則無不若不
樂一切皆是無常生滅不曾暫停生滅無故
無生滅處求不可得如是觀時即無三受得
三解脫男女等相亦復如是如幻如化無生
無滅不可得故如身念處五陰如相不可得
故無十八界故無一切受何以故六根六塵
六識空故求不可見名之爲空求亦不得名

之空空亦無有空復次禪波羅蜜中觀受念
處無生無滅無一切受即是涅槃觀察涅槃
亦不可得無名字故即無涅槃如是觀時初
學能斷一切煩惱又得一切宿命道自觀已
身現在初生五陰歌羅邏時生滅不住亦見
過去無量阿僧祇劫五陰生滅以身念處天
眼力故住初禪中能見如是宿命神通一切
生處壽命長短苦樂受報飲食衣服種姓名
字生死出沒國土世界欲性善惡悉見悉知
現在未來宿命因緣及一切事悉見悉知如
過去世亦知諸天六趣衆生三世宿命知已
不異亦復能知諸佛菩薩緣覺聲聞一切宿
命一念心中稱量盡願明了無礙於一切衆
生中得自在壽命隨其所感長短不同爲衆
生故現一切身受一切命欲度十方三惡道
衆生欲度餓鬼觀受念處住初禪中用如意
通施美飲食令其苦息而爲說法欲度畜生
時觀受念處入初禪時已入第四禪從四禪
起住第二禪用如意神通令諸衆生離畜生
業得人天令其歡喜而爲說法欲度地獄衆

生時觀受念處入初禪時已入第二禪從二
禪起入第四禪從四禪起住第三禪以如意
通變化十方阿鼻地獄及諸地獄悉爲天堂
一切苦具變爲瓔珞如其苦息如第三禪樂
隨應說法欲度福德大力衆生時觀受念處
及三念入初禪初禪起入二禪二禪起入三
禪三禪起入第四禪住火一切處放大光明
遍照十方住地一切處十方大地六種震動
住風一切處戒定慧香遍熏十方住水一切
處現月愛三昧十方重病苦惱衆生悉得消
除身心安樂住地一切處穢惡世界變爲淨
土池流華果七寶莊嚴放眉間光召集十方
諸大菩薩悉來集會口光頂光放中間光集
三界天王轉輪聖王阿脩羅王及諸小王并
諸天人放下光明普及三塗一切衆生集會
聽法悉爲受記受記之法凡有九種三乘及
六道是名九種差別受記如摩訶般若放光
論中說若放頂上肉髻光明徧照十方集大
菩薩并集過去多寶佛等又及十方分身應
化無量諸佛十方世界爲一切佛土滿中諸

佛移諸天人三塗八難置於他土不令在會無餘雜衆當知此會但說一乘爲一生補處菩薩受如來記若放眉間大光明同頂光中事當知此會爲大聲聞密行菩薩過十地入佛境界者受如來記如法華中說二種放光受記之法但說佛果事一乘佛智慧無餘雜衆故不說九道記問曰佛大悲悲平等說法衆生普聞復何意故說法華時三變世界八方通同爲一佛土初第一變八方五百萬億那由他恒河沙等諸佛世界同於娑婆上下兩方亦復如是第二變化八方各變二百萬億那由他恒河沙等諸佛世界亦同娑婆第三變化八方各二百萬億那由他恒河沙等諸佛世界同於娑婆如是三變各放眉間白毫光明移諸天人阿脩羅等三塗八難置於他方不得聞法當知如來心不平等答曰是事不然如來智慧非汝境界不應難言佛不平等佛以何故妙法華會但說一乘頓中極頓諸佛智慧爲大菩薩受如來記難信難解是故漏盡二乘人新發意菩薩及以不退諸

菩薩等疑惑不能解何況餘人譬如世間轉輪聖王莊嚴四天下集諸轉輪王共論聖王事唯有王邊智慧大臣乃能信解得近王座同論王事諸餘惡臣愚闇無智則不堪聞不得同座何況餘小王及諸僕使而近王座如來頓教亦復如是唯有一生補處無垢大士得佛智慧受如來記者乃得聞之此會不說引導之教是故餘人不得在座餘人若聞不解故即生疑謗墮於地獄是故移之置於他土四衆五千亦復如是譬如閻浮提人眼不見見上界諸天若得見者兩眼雙瞎薄福德故不堪見此諸天光明是故見者兩眼雙瞎天人阿脩羅三塗八難亦復如是尚不得見肉眼眉間受記光明何況聞說受如來記也若得聞者則生誹謗永失信心斷諸善根作一闍提將護彼意不得聞之譬如世間飢餓病瘦絕食來久薄腹者不得一往多食乾歎及以強餅麩麩驗酒一往飽食必死不疑五千四衆天人阿脩羅三塗八難亦復如是薄福德故不堪得聞受如來記問曰諸佛神通

無量方便一音說法隨類得解何故移之置於他土答曰如汝所問他土之音有二義一者本土是如來藏一切衆生不能解故貪善惡業輪迴六趣二者一切衆生無量劫來常在六趣輪迴不離如已舍宅亦名本土天人阿脩羅等薄福德故不能感見三變座席復不感聞本無如教甚深妙聲是本無如如來如一如無二如本末究竟等唯佛與佛乃能知之餘人不解五千四衆天人阿脩羅三塗八難不聞本無如不得究竟解故是故名爲置於他土復次五千天人阿脩羅及難處異座異聞得解薄少永捨六趣是故復名置於他土實不移却不覺不知不離本座物解不同故言他土欲重宣受念義而說偈言

行者初觀受念時 三種受法難捨離
苦受能生諸怖畏 亦生九惱諸怨害
常懷忿難作方便 得怨便時斷其命
或淨五欲起怨心 或諍名利作怨害
或貪住處獲利養 見勝已來欲殺害
或加誹謗惡名流 或時願人令殺害

是苦受法有三種 內受外受內外受
 若欲斷除諸苦受 當觀怨家如赤子
 亦如父母及兄弟 亦如諸師及同學
 生生無不從彼生 是無量劫之父母
 我曠劫來曾生彼 一切皆是我赤子
 此觀成時瞋恚盡 獲得大慈大悲心
 怨家悲歎生悔心 如見父母悉歸命
 我往昔曾彼受學 一切皆是我大師
 或修俗禮及五經 或學出世解脫道
 學善法故好名流 忍惱害故得神通
 一切皆是我和尚 亦是諸師及同學
 應當孝順勤供養 恭敬供養如佛想
 若受上妙五欲樂 人天王處自在樂
 三界天人王樂 無常至時皆碎破
 一切樂受是苦本 樂報盡故苦報至
 貪受榮華謂是常 愛別離時地獄至
 苦樂受盡則無苦 不苦不樂則無生
 具五方便除五欲 亦除五蓋障道因
 五欲五蓋煩惱盡 具足五支入初禪
 二禪三禪第四禪 還入初禪觀五陰

見身如泡空如影 出入息如空中風
 見過去世無量劫 諸受五陰生滅空
 斷五欲故煩惱盡 斷五蓋故獲五通
 斷五欲故獲如意 斷五蓋故獲三明
 是故諸佛而說偈 言內外怨賊皆已
 除無明父亦滅退 若能斷貪諸愛盡
 自覺覺他名解脫 諸行魔母既滅盡
 無明魔父亦破碎 既斷煩惱獲六通
 立大誓願度一切 自能斷除三受已
 亦斷眾生一切受 得自在受無量命
 亦知一切解脫受 知受凡聖九道記
 亦受補處如來記 若欲說法度眾生
 先現希有奇特事 深入禪定放光明
 普照十方諸世界 變諸穢惡為淨土
 七寶行樹以莊嚴 三塗八難悉解脫
 等齊人天來聽法 以受念處觀察之
 然後為其演說法 或令世界淨穢異
 眾生各見不相知 形色音聲種種別
 眾生各聞皆不同 各見佛同為說法
 都不見他前有佛 雖復差別各各異

能令一時各解脫 隨眾生壽命長短
 能自在受種種命 或見短壽入涅槃
 或見長壽無量劫 是受念處初學時
 能斷苦樂諸繫縛 初觀諸受內外苦
 亦觀諸受內外空 不苦不樂受亦空
 斷陰界入破無明 觀三受性非空有
 則無繫縛無解脫 法性無佛無涅槃
 亦無說法度眾生 眾生與佛一如如
 本末究竟無差別 坐道場得成佛道
 即是導師不便說 如人夢中得成佛
 放光說法度眾生 此無佛道無眾生
 佛法性相亦復然 眾生迷惑不覺知
 深著苦因不暫捨 諸苦所因貪為本
 捨貪求心無相依 見諸受空無生滅
 證苦無生苦聖諦 內外假合名為集
 無十八界集聖諦 生滅滅已名寂滅
 證無寂滅滅聖諦 陰無縛解無邪正
 證平等慧道聖諦 四諦無二是一諦
 實無差別四種諦 一諦空故即無諦
 無諦巧慧佛三諦 一切眾生從本來

無生無滅無縛解 五陰如性非明闇

凡夫與佛無一二 畧說受念處竟

三十七品亦在其中觀受念處多故受念處為主獨稱其名念處品復次行者初學禪時思想多念覺觀攀緣如猿猴走不曾暫停

假使行者數隨心觀亦不能攝即作是念三界虛妄皆心所作即觀是心從何處生心若在內何處居止遍觀身內求心不得無初生處亦無相貌心若在外住在何所遍觀身外覓心方所都不見心復觀中間亦不見心如是觀時不見內入心不見外入心不見內外入心不見陰中心不見界中心當知此心空無有主無名無字亦無相貌不從緣生不從非緣生亦非自生是名行者能觀心心念生滅觀念念生滅觀念念相不可得故亦無生滅如觀我心他心亦然復觀心性無有心性無有心性亦無相貌畢竟無心亦無不見心如是觀竟身心空寂次第入禪能起神通復次菩薩摩訶薩觀心念處學得一切禪定解脫起如意神通立大誓願度一切眾生應

先觀其心入初禪次第入至第四禪乃至滅受想定還入初禪心觀念處內心外心內外心亦復觀察三毒四大五陰十二入十八界十二因緣如是觀竟觀諸解脫徧一切他心智三昧以他心智如意神通亦入天眼宿命

漏盡神通徧觀中如是諸神通已觀七覺分住他心智三昧用念覺分擇分覺分及精進覺分徧觀十方一切眾生心心性欲用十力智分別之一一衆生感聞何法聞何音聲見何色像於何解脫門而得解脫如是觀竟用喜覺分神通三昧悉令十方六道衆生皆大歡喜用除覺分定覺分捨覺分用如意神通普現色身上中下根隨機說法悉令解脫此心念處初修學時身心得證自斷一切心想妄念諸結煩惱亦能如已教他人學但未得神通不能明力不識衆生種種根性所念各異不稱其機利益甚少作是思惟但是學時未是說時不應強說非時之言若修禪定獲大神通如意自在得他心智差別三昧一念悉知凡聖差別之心通達無量阿僧祇劫過

去未來如現在世如是學竟乃可說法思惟既竟還入初禪觀於身心空如影息如空風心無相貌輕空自在即得神通住第四禪放大光明一者色光徧照十方凡聖色身二者放於智慧光明徧照十方九道凡聖上下智

慧悉能徧知彼是處非處及知宿世因緣果報亦如身念處受念處三昧如是竟現一切身十方遠近如對眼前各為說法悉令解脫欲說法時現希有事悅可衆生令大歡喜以神通力十方世界穢惡之處變為淨土金銀瑠璃一切衆寶間錯其地充滿世界上妙梅檀七寶行樹華果茂盛行列相當臺館樓櫺城邑聚落七寶房榻如意寶珠光明相照若日月現猶如如來所居淨土諸佛菩薩充滿其中各現神通降伏天魔破諸外道或有諸佛寂然禪定上下身分放大光明猶如段雲徧滿十方光明中現一切佛事或有菩薩現不思議四大海水置一毛孔水性之屬不覺往來須彌王置芥子中亦不迫迫還置本處諸四天王及忉利天不覺不知三千世界置

一毛端亦不傾側一切大眾不覺寬迺如故
 不異人天交接兩得相見一切人天未得道
 者及諸聲聞小行菩薩皆得見此不思議事
 十方諸佛諸四天王及阿脩羅迦樓羅緊那
 羅摩護羅伽等悉與菩薩對面共語能以一
 面對一切面如鏡中像面亦不異然後說法
 悉令聞者一時得道是名菩薩住心念處如
 意神通如願三昧三十七品一切佛法悉在
 其中觀心念處本是故心念處為主獨舉其
 名宣心議而說偈言

內心外心中間心 一切皆是心心數
 心性清淨無名相 不在內外非中間
 不生不滅常寂然 非垢非淨非明暗
 非定非亂非緣慮 非動非住非來去
 非生非死非涅槃 非斷非常非縛解
 非如來藏非凡聖 不了名凡了即聖
 行者初學求道時 觀察心數及心性
 觀察心數名方便 覺了心性名為慧
 初坐禪時觀不淨 觀出入息生滅相
 不淨觀及出入息 是心心數非心性

觀心心數斷煩惱 心即是煩惱性
 心數心性平等觀 具足禪慧成大聖
 不淨初學斷五欲 久修獲得如意通
 初觀息解假名空 久修飛行無障闕
 二觀具足成一觀 獲得三明見三世
 身念受念及法念 覺了三念由觀心
 內假外假內外假 此三假名非實法
 心念非假非真實 求了三假當觀心
 一名心相二名性 三假由相不由性
 從無明緣至老死 皆是心相之所造
 此假名身及諸受 善不善法及無記
 皆由妄念心所作 觀妄念心無生處
 即無煩惱無無明 心性無念不可觀
 觀四念處心想盡 煩惱盡故即盡智
 若觀心性了四念 解無生法無生智
 無妄念心無緣慮 無雜染故無六道
 若人隨順妄念心 持戒坐禪欲求道
 如雨綵衣其色變 不證無漏著禪味
 不得解脫歸四趣 何況破戒無禪定
 顛倒亂心著文字 心性清淨如明珠

不為眾色之所污 譬如清淨如意珠
 雜色物裏置水中 能令清水隨色變
 青物裏時水則青 黃赤白黑皆隨變
 珠色寂然不變異 心性清淨如意珠
 善惡業雜緣色雜 十善有漏禪生天
 行十惡業生四趣 持戒清淨修禪智
 證得無漏解脫道 從生死際至涅槃
 心性寂然不變異 譬如世間如意珠
 隨人所求皆應現 珠無心相無異念
 隨所求念悉周徧 心性無體無名字
 隨學者業凡聖現 若人欲求解脫道
 具足十善觀三性 心性眼性及意性
 具足三信三解脫 觀身心空持淨戒
 證真如解名信戒 觀身如影如化生
 觀心無主無名字 觀罪不罪如夢幻
 乃至失命不破戒 持戒畢竟證寂滅
 速離得相之分別 持戒雖空不雜世
 亦不著空隨世法 深入涅槃解脫意
 不捨世間十善行 獲得無漏禪智慧
 無定亂心定信時 修四念處斷四倒

證四真諦一諦相 是名般若波羅蜜
諸法如性名慧信 若人具足此三信
是人乃可得法施 信施戒聞慧慙愧
是此七財名導師 若不具足此七法
是人不應昇高座 既無信證自不知

向眾妄語何所說 此人誑自亦誑他
忽忽亂心謗佛說 如富長者自有財
所行法施名實施 若人修道證解脫
如富長者行實施 受者學者皆効此
先學自證如實說 不應忽忽亂後世

佛意甚深難可知 如教修行證乃解
此性雖空無生滅 隨喜惡業必有報
譬如虛空無明暗 風雲靜亂有明暗
若平旦時無風雲 日出虛空大明淨
若風黑雲暴亂起 虛空塵霧大黑風
是虛空性無垢淨 不為明暗之所染
眾生心性亦如是 生死涅槃不能染
眾生心性亦如是 不為斷常之所染
眾生心性若無常 念念滅壞無業報
眾生心性若是常 如空不變無業報

心性亦非非無常 除煩惱故得解脫
生死解脫不失故 若言心性非無常
求道不應得解脫 若捨生死得解脫
當知解脫即無常 若生死性不可捨
當知則無有解脫 若言生死不可捨

此人所說不可捨 若言生死是可捨
此人所說不可依 若言死法不可捨
眾生則不得解脫 是義應然何以故
眾生非是生死法 眾生若是生死法
捨生死則捨眾生 眾生若是自捨者

亦應自捨解脫法 眾生之性即心性
性無生死無解脫 如虛空性無明暗
無有生死無解脫 眾生心性如明珠
生死解脫喻如水 萬惡萬善喻眾色
隨善惡業種種現 顛倒妄念造善惡
隨業受報徧六道 若持淨戒修禪智
法身處處皆應現 雖隨業影種種現
心性明珠不曾變 舍利弗問一比丘
比丘汝今得解脫 比丘答言舍利弗
我今獲得諸煩惱 我今不在於涅槃

亦復不在於生死 若言生死即涅槃
即陰計我是外道 若言生死非涅槃
離陰是我是外道 若言不即不離是
亦非不即非不離 此人具足六十二
悉是邪見外道輩 眾生非是眾生相

亦復非是非眾生 生死涅槃假名說
唯佛與佛乃知此 義說心

法念處品

復次菩薩初學坐禪觀法念處者善法不善
法無記法善法者有二種一者有漏十善道
及有漏四禪四空定是世間善法二者出世
間善無漏四禪四空定四四定滅受想定三
十七品是出世間善法不善法者有二種一
者身口意十惡法二者身口意作五逆罪復
有一人重於五逆是人學道值惡知識魔鬼
入心常說是言我解大乘甚深空義犯四重
罪姪欲熾盛飲酒食肉不持齋戒作如是言
諸法悉空誰垢誰淨誰是誰非誰作誰受作
是念已即便破威儀破正命無量眾生墮
解怠不能求道見此易行惡趣空法即便破

戒共相朋黨謗佛謗法罵比丘僧輕毀一切比丘令使疑惑悉皆破戒斷諸佛種罪重五逆命終悉入阿鼻地獄常詐稱言我如善根法師解甚深義餘精進者悉是勝意比丘不如我等如是欺誑壞眾生故但著惡趣空實不識佛法毀三寶故罪重五逆大集經中佛告頻婆娑羅王未來世有諸惡比丘行姪破戒飲酒食肉向四眾說我解如來大乘空義多領無量破戒眷屬四眾無力不能治之佛復語王言我今以此大乘經法付囑國王令治破戒諸惡比丘王若不治死入地獄頻婆娑羅王聞已悉之是名惡法行比丘則不行此破戒惡法無記法者一非十善二非十惡中間散亂無記之心善惡不攝是名無記復次阿毘曇中色中一可見十則說有對無記謂八種餘則善不善此是十二入色中一可見者眼有二入但見前境善惡眾色不自見眼根覺是名一可見若見人等怨親中人記之妄別經久後得相見時猶故相識我曾某處共居相見餘眾生非眾生色亦復如是

皆屬一色入是故說言色中一可見十則說有對者耳對音聲鼻對香臭舌對於味身對眾觸意對法是故說言十則說有對無記謂八種者耳根對聲不能相見不知處所不見色像不能記錄亦復不識冤親中人及餘音聲非人響聲若眼不見心意不覽悉不能記但能相對譬如有人於說法座下坐心緣外事境外境界眼亦不觀乃至緣座都不曾聞法師語聲鼻舌身根亦復如是不能記錄故名無記設有記者悉意等三事和合乃能記之獨不能記四根對四塵故言八種不能相記是故說言無記謂八種餘則善不善者意法相對悉能記錄善不善事我曾某處作如是功德若干善法我曾某處作若干重罪若干輕罪我於某處不作善惡隨宜而住都無所作我曾某處得若干好物若干不好物善不善法亦復如是然其意根都無處所能懸屬正當五塵之事譬如神龜懸悟密事悉能記錄不名無記但得名為善不善法心能總覽十二入法六識由心意但少分不能盡知

攀緣計校名之為心屬當受持名之為意是故大集經中坐禪學道法行比丘但觀三性一者心性二者眼性三者意性此三法輕利用事強故復次法念處內法外法內外法內法者是六情外法者是六塵名為六境內外法者名為六識亦名六神名十八界三毒四大五陰十二入十二因緣悉是其中今但總說餘者亦攝一切一切煩惱無明為主因眼見色生貪愛心愛者即是無明為愛造業名之為行至心至念名之為識識共色行名曰名色六處生貪名為六入因入求受名之為觸念色至法名之為受貪著心者即名為愛四方求覓名之為取如是法生名之為有次第不斷名之為生次第斷故名之為死眾苦所逼名之為惱乃至識法因緣生貪亦復如是如是十二因緣一人一念中心悉皆具足名為煩惱生老病死十二因緣非是解脫夫解脫者因眼見色生貪愛心名為無明為愛造業名之為行未睹色時名為獨頭無明亦名無始無明亦名不共無明若眼不對色則

不能生愛無伴共合故無愛行二法不能於中種識種子故名爲無明獨頭無明不共無明二乘聲聞及諸行人初入道者不能斷此無始無明諸佛菩薩及二乘行人但斷有始共伴無明共愛合故名之爲伴能作行業名爲始生是身初因是故爲無始無明無明爲父愛心爲母行業和合生識種子亦得名爲種識種子種未來身故名爲種名色是芽故名生如是別知乃能斷除求解脫者應觀察生死父母斷令皆盡不令有餘夫觀察者

眼見色時應作是念空明根塵意識屬當妄想和合共生眼識觀衆色像假名爲眼復作是念何者是眼空是眼耶明是眼也塵是眼也意是眼也爲當識獨生名爲眼也眶骨是眼也精淚是眼也瞳人是眼也若空是眼無色無對無所見故不應是眼若明是眼無根無覺無所知故不應是眼若根是眼精淚瞳人眶骨白異空明未現觀不見色空明設現精盲之人眼不破不能見色當知空明及根都無有眼若色是明色性無知不能自見空

無生處無情無對不與根合當知色塵空無有眼何以故假使根塵對空明不現意不屬當即不見色當知根塵空無眼復作是念意是眼也若意是眼能見色者盲瞎之人意根不壞不能見色當知無眼假使不盲有眼之人眼不對時意根不壞不能見色以是定知意非是眼意空無根無生無滅無名無字眼空無根無有生滅亦無眼名字諸因緣故無集無散無識名如是觀時不見眼始來處無始法亦無求無始法不可得故名曰無始空無有無始可破故亦無無始空爲世流布故名爲方便慧明解無始空是名方便慧無始空亦無無性亦無名之爲慧性若破和合共伴無明是方便智若破無始無明名之爲度故名爲智度菩薩母方便慧以爲父一切衆導師無不由是生萬行得補疏則生如來家故名不生更有一解若斷有始和合無明是名無生若知無始無明能斷能知無所斷故是名無生法名之爲慧是名中慧破有始無明名爲盡智慧亦得名爲盡智有爲煩

惱盡故名爲盡智斷無始無明名爲無生智若知無無始則無始空名無生法忍無法亦無不見不無無亦不有是觀無明生亦無亦不見無性不見無無性亦非是不見非非無所見無有無所見亦非非無有無所見不名有所得不名無所得名爲如如性無生法忍慧非智之所及十八種空智所能攝無名可說故亦非是無明是故佛言五陰之法既非是有亦非是無不斷不常不在中道無空無無相亦無有無作不合亦不散名相法亦無既見有衆生不見無衆生涅槃非是有亦復非是無是名法念處雖知諸法爾精進禪定苦行求佛道不墮惡趣空捨度一切衆其心不退轉更畧說復次眼見色時即及觀察內求覓眼誰能見色何者是眼從何處生如是處生如是觀時都不見眼亦無生處亦不見亦無生名無字都無明貌復觀於色從何處生誰使汝來如是觀時不見生處亦無使來者求其生處不可得故如空中影如夢所見如幻化無生無滅即無有色無所得故耳鼻

舌身意亦復如是六識為枝條心識為根本無明波浪起隨緣生六識六識假名字名為分張識隨緣不自在故名假名識心識名為動轉識遊戲六情作煩惱六識緣行善惡業隨業受報徧六道能觀六根空無主即悟諸法畢竟空觀妄念心無生滅即斷無始無明空解六識空得解脫無六識空無縛解何以故六識非有亦非空無名無字無相貌亦無繫縛無解脫為欲教化眾生故假名方便說解脫解脫心空名金剛智何以故心不在內不在外不在中間無生滅無名字無相貌無繫無縛無解脫一切結無障礙假名說為金剛智更總說心作二分名心相二分名心性相常共六識行心性畢竟常空寂無有生滅無三受則無一切諸煩惱復次修行者欲破業障諸煩惱作如是思惟由我有身故諸業聚集生我今此身從何處來本無從何生誰之所作如是觀時即知此身因過去世無明行業和合聚集而來生此我今不能見過去世造業因緣但觀現世從生已來所作善惡

比知過去作是念竟觀我現在世殺生偷劫邪淫善惡及無記心先觀姪欲愛境強故我於某處某年某時共某甲誰使我作業在何處業若屬我徧身內外中間觀察都不見業業若在身外在何方所徧觀察之都無處所既不見業觀造業心業若與心俱念念滅業亦應滅如是觀時亦不見不滅初念見和合觀察即空無念無滅嘿然正定念起即更觀數數重觀察不念見和合念生不復生既無妄念心則無現在世過去亦爾復作是念心行若無常我亦無業報何以故念念滅盡故心行若是常我亦無業報何以故常法如空不變易故但虛妄念如夢所見無作夢者何況見夢法心相如夢者諸行如夢法無夢無夢法亦無觀夢者夢非是生滅亦非無生滅觀夢者亦然觀察心相及行業不斷不常觀亦爾是名觀心相破一切業障名之為解脫即觀心性時心性無生滅無名無字無斷常無始無原不可得當知無心無無心亦無心名字如是觀察竟坐禪眼不睡覺觀不復

生次第入諸禪觀身如泡影次第發五通獲得如意通擔度眾生是名字脫也
坐禪修覺意
復次修法念處應勤坐禪久久修習得一切定解脫三昧如意神通發願擔度一切眾生先觀眾生感聞何法而得入道若修多羅若優婆提舍若毘尼若阿毘曇若布施戒忍辱精進禪定智慧若說三毒對治之法若四大若五陰若十二十八界若十二因緣若四念處若四禪若四真諦若不說法直現神通若疾是遲是處非處如是各各感聞不同色像音聲名字差別各各不同皆得聖道或有眾生不可教化假使說法神通變化無如之何或有眾生若先說法及現神通不能生信要先同事自恣五欲及餘方便破戒之事欲心得息隨應說法即可得道如是觀竟示諸眾生一切世事應可度者乃能見耳餘人不見如是籌量觀弟子心而為說法是名好說法不令著機十號中名修伽陀佛如是觀察入初禪初禪起入二禪二禪起入三禪三禪

起入四禪四禪起入四空定四空定入滅受
想定滅受想定起住第四禪觀四念處入法
念處三昧如意神通十方世界六種震動放
大光明徧照十方諸大菩薩三界人天悉來
集會四念處力能令大眾各見世界淨穢不
等各不相知現不思議神通變化無量種異
感見佛身亦復如是於一法門無量名字差
別不等現無量身為眾說法各不相知獨見
一佛一念心中一時說法見聞雖復各不同
得道無二只是一法是名菩薩法自在三昧
法念處成就故三十七品亦在其中但法念
處為主獨稱其名總說法念處竟

諸法無諍三昧法門卷下

諸法無諍三昧法門卷下
校勘記

- 一 底本，清藏本。
- 一 七八八頁上二行撰者，[南]無。
- 一 七八八頁上一四行第五字「復」，[南]作「若」。
- 一 七八八頁下四行第一一字「蕭」，[南]作「箏」。
- 一 七九〇頁上二行「不聞」，[徑]作「不關」。
- 一 七九〇頁上三行「耕種」，[南]作「下種」。
- 一 七九二頁下一〇行「不便說」，[南]、[徑]作「方便說」。
- 一 七九三頁上二行小字「畧說受念處竟」，[南]作「畧說受念處竟已」；[徑]置於四行第六字「名」下。
- 一 七九三頁上一三行「無名無字亦無相貌」，[徑]作「無名無名行無相貌」。
- 一 七九三頁上一四行「是名行者」，[徑]作「是是名者」。
- 一 七九四頁中一九行「歸四趣」，[南]作「婦行趣」。
- 一 七九四頁下一三行「持淨戒」，[徑]作「及解脫」。
- 一 七九四頁下一六行「證寂滅」，[南]作「名寂滅」。
- 一 七九五頁上二行「名慧信」，[徑]作「如慧信」。
- 一 七九六頁中六行「心意」，[南]作「心音」。
- 一 七九七頁上二行「種識種子」，[南]作「種釋子」。
- 一 七九七頁上八行「種識種子」，[南]作「種釋種子」。
- 一 七九七頁上一二行首字「想」，[徑]作「相」。
- 一 七九七頁中末行第六字「盡」，[南]無。
- 一 七九七頁下一四行第一四字「及」，[南]作「反」。
- 一 七九八頁下二行「誓度衆生」，[徑]作「普度衆生」。